

## In salid *rumantsch*

Finalmain è la stad arrivada. E cun ella per blers era las vacanzas a la mar. Da pitschna gievan nus – mes geniturs, mes frar ed jau, e mintg’onn er anc in pèr ondas, augs, cusrins ed amis – per duas emnas a la Costa Brava en il nord da la Spagna.


Per mai è quai ditg stà il lieu da mes siemis. Dasper il far bogh en la mar blau turchisa, il smarschunar a la splanja ed il termagliar cun sablun, ans legravan nus cunzunt era dad ir la saira ensemen a tschaina. Ina da nossas ustarias preferidas era ina pitschna pinta d’indigens en il vitg vischin,

### Las bumbas spagnolas



nua ch’i deva da tuttas sorts tapas. Nus empustavan tuts ina duas buccadinas spagnolas e suenter sagiavan nus en crusch ed a travers sur maisa vi, tuts in pau dal tut or dals plattins dals auters. Jau ma regord anc bain co che nus faschevan risadas, baterlavan e mangiavan uras a la lunga. Ils ulteriurs turists en l’ustaria pensavan segir che nus sajan indigens che discurren cun noss rumantsch in dialect spagnol tut aparti ...

Mia tapa preferida eran las bombas, las cullas da tartuffels frittadas emplenidas cun charn manizzata e servidas cun salsa brava, ina sosa da tomatas picanta, ed aioli, la famosa maionesa dad agl. Ed era sche jau hai cun ils onns provà in pau da tuttas tratgas, las bumbas spagnolas tutgan anc oz tar ils top diesch da mia glista da favurits culinarics. Stai bainin e laschai gustar las spezialitads da vossa destinaziun da vacanzas!

  
Angela Schmed